

BATAKURU PUULUSA ARANURU HAA E TIMOTEE

1 ¹Immorde e an min Puulusa, mo Alla, on Dandudo en, e Iisaa Almasiihu, on wondo tama'u men, yamiri wonugol *sahaabaajo Iisaa Almasiihu on.

² Mi salminii ma yo Timotee, an oo biid do an e nder gomdinal.

Yo Alla Baabaajo on e Iisaa Almasiihu Joomi men on yede moyfere e yurmeende e buttu.

Fii Reenagol e Jandeeji Fenaandeeji

³ Wano mi wakkilinirno-maa non wonugol Efeesi don, fewndo ko mi fokkiti Masedonii, fii yo a yamir wobbe goo wota be jannu janndeeji goo, ⁴e wota be cato e tindi mehi e lasilankaaku ngu lannataa, ko memminta yeddondire, hara hinaa wadugol golle Alla den e nder gomdinal. ⁵Ko woni faandaare ndee yamiroore, ko yidirgol bernde laabunde e fondo moyyo e gomdinal ngal aldaa e faasiqankaaku.

⁶Wobbe ben sortii e den pehe, ukkii e haalaaji mehi, ⁷hara hibe faalaa wonude jannoobe fii Sariya on, e hin-le be faamanaa hay ko be woni wi'ude kon, e ko be woni tentinde fii mun kon.

⁸Hiden andi tigi wonde Sariya on no moyyi, kono ko e hoore jogitorgol mo no haaniri. ⁹Awa kadi anden Sariya on wadiraaka fii feewube ben, kono ko fii bonbe ben e dartiibe ben e heeferbe ben e junuubankeebe ben e be rewataa Alla ben e hayfinoobe fii Alla ben e waroobe ben mun e yumma mun ben e ittoobe ko'e ben ¹⁰e jeenoobe ben e worbe jinoobe worbe e yeeyoobe yimbe e fenoobe e woondoobe fenaande ben e kala wadoobe kuude woopondirde e jannde haqiqaare nden. ¹¹Ndee jannde no yaadi e Kibaaru Moyyo mo o halfinimmi on, on bangindo mangural Alla moyyo on.

Fii Moyyere nde Alla Yedi Puulusa nden

¹² Mi jarnii on yeddindo lan, dun ko Iisaa Almasiihu Joomi men on, jogitordo lan wa holniido, toddii mi e dee golle makko, ¹³ min oo hoynaynoodo, cukkotonoodo, yennaynoodo. Kono mi yurminaa, ko fii ko mi wonnoo warrude dun, ko angal gandal e angal gomdinal. ¹⁴ Joomiraado on yedii lan moyyere no yaajiri, wondude e gomdinal e giggol ko woni e Iisaa Almasiihu on kon. ¹⁵ Ngol kongol doo kohaqiiqawol, hingol handi e jabeede few, ngol-le e hino ngol: Iisaa Almasiihu on ko ardi ka aduna ko dandugol junuubanke'en. Min non ko mi burdo bonde e ben. ¹⁶ Kono mi yurminaa, fii no Iisaa Almasiihu on banginira e an, min oo burdo bonde, yondinaare makko nden fow, fii no mi wonira misal e gomdinoyoobe e makko ben, be heba *ngurndan poomayankejan.¹⁷ Teddungal e mangu wonanii Lando poomayankeejo, mo maayataa, mo yi'otaako, Alla bajjo, haa poomaa.

Aamiina!

¹⁸ Ndee yamiroore nde mi yamir-maa, yo Timotee biddo an, wano *hiitoraa fii maa non, ko yo a tippir tippiro moyyo ngon ¹⁹ e nder gomdinal wondude e bernde laabunde. Nden bernde laabunde non wobbe ben tertike nde, haa ka tawata gomdinal mabbe ngal yoolike.²⁰ No tawaa e ben Himenee e Aleksander, ben be mi accidi e Ibiliisa fii jannugol be wota be hoynu Alla.

Fii Dewal e Toraare Alla

2 ¹ Ko adii kon taho, mido torii yo en landano yimbe ben fow ballal Alla, wadanen be torndeeji e du'aaji e yettooje Alla, ² wadanen dun kadi lambe e kala yeesoobe, fii no wuuriyen ngurndan newiidan e buttudan wano Alla faaliraa non e hoore teddungal. ³ Kodun woni ko moyyi, ko welata Alla, Dandudo en on, ⁴ on Yidudo yo yimbe ben fow dande, be ara e andugol goonga on. ⁵ Ko fii ko Alla gooto woodi, no woodi kadi moyyintinoowo gooto hakkunde makko e yimbe ben, dun ko oo neddo wi'eteedo Iisaa Almasiihu, ⁶ on sakkiido hoore mun fii sottugol fow, dun ko

seedee wadaado e saa'i toddaado on.⁷ Ko fii fenjingol on seedee wadi si mi wadiraan waajotoodo e yottinoowo, (mi wowlay goonga, mi fenataa), fii ko janna 6e wonaa Yahuudiyanke ben ko woni gomdinal goongawal ngal kon.

⁸ Mido yidi kadi yo worbe ben toro Alla ka woni woo, e hoore townugol juude laabude e baawo tikkere e yeddondiral.

⁹ Rewbe ben kadi wano non, 6e bornora no haaniri, hara hinaa no maniree e no hawnori, hara 6e ukkaaki e mordi hawniidi e cudorgol kañje e kode hittude, maa conci satta-cogguuji,¹⁰ kono ko wadugol kuude moyye, hara ko yaadude e kuude rewbe qirritiibe rewugol Alla.

¹¹ Awa kadi yo debbo jangu e nder deeyere e yankinaare timmunde.¹² Mi yamiraali non debbo jannugol, maa laamagol gorko, kono ko yo o deeyu.¹³ Ko fii ko *Aadama adaa tageede, si *Hawa hikki don.¹⁴ Awa kadi wonaa Aadama daynanoo, kono ko debbo on daynanoo, o bonni yamiroore Alla nden.¹⁵ Kono fow e mun, debbo dandirte jiidi mun ndin si o duumike e nder gomdinal ngal e giggol e laabal no haaniri.

Fii no Ardotoobe e Wallitotoobe Moftal ngal Haani Wonirde

3 ¹ No wi'aa: on mo no yelii wonugol yeesoojo ka *moftal Alla, haray ontigi ko huunde moyere woni ko faalaa. Ngol kongol ko haqiqawol.² Kono fow e mun yo taw ardotoodo on ko neddo mo felnaaki, hara ko yondinordo debbo gooto, waawudo hoore mun, hara wonaa ubbitoowo, hara ko o teddintoodo, wernoowo hobbe, waawudo jannude,³ hara hinaa yaroowo mandila, hinaa jaadudo, kono hara ko o newiido, hara hinaa yeddondirteedo, hara ko mo haajaaka e ngaluuji aduna,⁴ hara ko ardotoodo moyya beynguure mun nden tigi, e ne'udo faybe mun ben, hara hibe yankinanii mo e nder teddungal timmungal.⁵ Ko fii si goddo waawataa ardaade beynguure mun nden tigi, haray ko honno ontigi waawata dankorde moftal Alla ngal?⁶ Yo taw wonaa gomfindo kesun, fii wota o heewu

townitaare, haa o yana e jaawoore nde Ibuliisa jaawaa nden.⁷ Bee o hebira 6e gomdinaa 6en kadi seeditoore moyyere, fii wota o hebu feloore, o yana e pircol Ibuliisa.

⁸ Wallitotoobe moftal ngal 6en kadi wano non, hibe haani wonude teddube, woddiibe faasiqyaagal e njaram feyyitudan e dabbirgol miile.⁹ Hibe haani humaade e goonga luggudo gomdinal ngal e nder bernde laabunde.¹⁰ Kambe kadi non hibe haanaa ndarndeede taho, onsay non si tawii hay huunde alaa kobe feliree, be wada non den golle.

¹¹ Rewbe 6en kadi wano non, yo 6e wonu teddube, hara 6e wonaali jo'oobe, 6e wona waawube hoore mabbe e sella-findeebe e kala huunde.

¹² Wallitotoodo on no haani tawde ko yondinordo debbo gooto, e ne'irdo bibbe mun 6en e beynguure mun nden no moyyiri.¹³ Ko fii kala wallitotoodo, golludo den golle no moyyiri, heboyay teddungal tiidungal e hoolaare mawnde ka gomdingol makko Iisaa Almasiihu on.

¹⁴ Mi windanii ma dundoo e hoore tanyinagol mi yahay ka maa ko neebaa.

¹⁵ Kono si mi aru e tongaade, dun a anday ko honno haanudaa wuuirde ka suudu Alla, ndun-le ko moftal Alla Wuurudo on, doosal e balal goonga on.¹⁶ Awa kadi no fellitaa wonde gundoo ngal dewal no mawni:

«Dun ko on feenirdo bandu,
holliraado Ruuhu Alla ko o feewudo,
feenando malaa'ikaabe 6en,
on jantaado fii mun e hakkunde leyyi din,
o gomdinaa e nder aduna on,
oyentinaa ka kammu e nder mangural.»

Fii Yamirooje de Timotee Yamiraa den

4 ¹Kono Ruuhu Allaahu on no holli no laabiri wonde, ka saa'iiji sakkitori wobbe ben tertoyo gomdinal ngal fii jokkugol ruuhuji daynaydi e janndeeji jinna, ²be dayniree faasiqankaaku e waajuuji fenaandeeji, tawa bernde mabbe nden no jukkiniraa wa ko sunniraa njande wojjiniraade yiite. ³Ben yimbe wi'oyay wota dese wadu, be harmina naameteeji di Alla wadi fii yo gomdinbe ben e andube goonga on ben jaamu e nder jarnugol mo din. ⁴Hara-le ko Alla tagi kon fow no moyyi, huunde wonaa ko bugitete. Ko jarnugol tun Alla nde hiden huutora. ⁵Ko fii ko Alla tagi kon fow no *laabbiniraa daaluyee on e toraare.

⁶Si a weebitanii dun musibbe ben, a wonanay Iisaa Almasiihu on kurkaadu moyyuru, eltiraado daaluyeeji gomdinal ngal wondude e janndeeji moyyi di jokkudaa din tigi. ⁷Kono an, bugito taali neddanke mehi di yummiraabe yewtata. Eltiraa hoore maa wuuirgol wano Alla faaliraa non. ⁸Ko fii eltugol bandu ndun ko seeda nafi, kono wuuirgol wano Alla faaliraa non kan no wondi e nafa e nooneeji din fow, no wondi kadi e fodaari ngurndan fewndiidan dan e aroyaydan dan. ⁹Ngol ko kongol haqiqawol, handungol e jabeede few wano ngol woniri non. ¹⁰Ko wonden gollirde tippira, ko fii en wadii tama'u men on e Alla Wuurudo on, on Dandoowo yimbe ben fow, tentinii gomdinbe ben.

¹¹E hino ko haanudaa yamirde, janna kon. ¹²Wota hay gooto yawo ma fii ko a suka, kono wonan gomdinbe ben misal e kongol e jikku e giggol e gomdinal e laabal. ¹³Doo e mi arude, cato e jangangol yimbe ben daaluyee on, waajodaa be, jannaa be. ¹⁴Wota a weddito e dokkal maa ngal, ngal yediranodaa *hiitaango ngal, fewndo ko ardotoobe *moftal ngal *fawi juude e hoore maa. ¹⁵Huutor, wonaa e dun tun, fii no golle maa den bangirana fow. ¹⁶Wattaa yiila e hoore maa e ko jannataa kon e nder cataare. Ko fii si a wadirii non, a danday hoore maa, dandaa hedotoobe ma ben.

Fii no Gomdinbe ben Haani Wondirde

5 ¹Awa kadi wota a felir nayeejo no sattiri, kono waajor mo wa si ko o ben maa, sukaabe worbe ben kadi wa mijiniraabe maa, ²rewbe nayeebe ben kadi wa neeniraabe maa, jiwbe ben kadi wa bandiraabe maa e nder laabal timmungal.

³Teddinaa kadi keynguube ben, hara ko keynguube be alaa ballo ben. ⁴Si keynguujo no maribibbe maa taaniraabe, yo ben ekkito taho wuuringol wano Alla faaliraa non e telen-ma dankagol beynguure mabbe nden tigi, ko nii be yobitirta mawbe mabbe ben, ko fii dun no wela Alla. ⁵Keynguujo tigi-tigijo mo alaa ballo on no wadi tama'u mun on e Alla, duumii e toragol mo jemma e jalorma.⁶Kono keynguujo jokkudo mbeleede ko maydo, fii kala himo wuuri. ⁷Kodundoo haanudaa waajaade fii wota ben keynguube wonu felniibe. ⁸On mo dankaaki sibbe mun ben, tentinii beynguure mun nden, haray o bugitike gomdinai ngal, awa kadi haray hay mo gomdinaa no buri mo.

⁹Fii yo keynguujo windodu e keynguube haanaabe walliteede ben, yo taw ko fandi woo himo mari duubi cappande jeegoo, hara kadi ko yondinornoodo gorko gooto, ¹⁰hara kadi ko andiraado kuude moyye, wano ne'ugol faybe, wernugol kadi hobbe, sembugol koyde yimbe Alla ben, wallitagol tampube ben, wadugol kala kuugal moyyal.

¹¹Kono wota a jabu winditude keynguube heccidube ben, ko fii nde himmeeji mabbe din woddsintini be *Almasiihu on woo, be faalete yetteede, ¹²be adda jaawoore Alla e hoore mabbe, sabu ko be firti *ahadi mabbe araniri ndin kon. ¹³E hoore fun, be wona puybe, be wowtinoo naata e nduu, yalta e nduu, be beyda e dun jooreeji, be wona humpaabe, be wona e wowlugol piiji ci haanaaka wowleede. ¹⁴Kodun wadi si mi wi'i yo keynguube heccidube ben yette, be heba bibbe, be ardo Beynguure mabbe nden, fii wota en jonnu liddotoobe en ben

jolkun woo no ɓe aybinira en.¹⁵ Ko fii wuren wobbe e mabbe murtii, jokkii Ibuliisa.

¹⁶ Si debbo gomdindo no mari keynguube ka mun, yo o wallito ɓe, hara hinaa *moftal ngal fawtii ɓe, fii no moftal ngal waawira wallitorde keynguube ɓe alaa ballo ɓen.

¹⁷ Ardotoobe moftal ngal moyya no handi e teddungal sowondirngal, tentinii ɓen wakkiliibe yangi waajagol e jannugol.¹⁸ Ko fii bindi din no wi'i: «Wota mo buuma hunduko ngaari ndin nde hindi yaabana dun maaro», awa kadi: «Golloowo no handi e njoddi mun.»¹⁹ Wota a jaɓu toope e hoore ardotoodo woo, si hinaa a hebu seeditiibe dido maa tato.²⁰ Duumiibe e wadugol junuubu ɓen, wurtu ɓe e yeeso fow, fii no heddiibe ɓen kadi hulira.

²¹ E yeoso Alla e Iisaa Almasiihu on e malaa'ikaabe subaabé ɓen, mi yamirii ma jokkugol dee yamirooje e baawo burdindingol maa gidaale.

²² Wota a hawju *fawugol juude e hoore hay gooto toddoo mo fii golle Alla den. Wota a tawde e junuubaaji wobbe. Reeno, wonaa laabudo.

²³ Accu yarugol ndiyan tun, huutoraa kadi njaram *wiijnu seeda, sabu nawnahoy reedu maa jokkondirkoy koy.

²⁴ Junuubaaji yimbe goo no feenji ado ɓe jaaweede, wobbe ɓen non di feenjirii woo yeoso.²⁵ Ko wano non kadi kuude moyye den no feenji, hay de feenaa den kadi waawataa suudaade.

6 ¹ Yo jiyaabe ɓen fow jogor jeybe dun ɓen wa handube e teddungal timmungal, fii wota innde Alla nden e jannde nden hoyne. ² Ben jiyaabe, ɓe tawata jeybe dun ɓen ko gomdinbe, ɓe haanaa ka ɓe ronka ɓe teddinde, bay ɓen ko musibbe mabbe. Kono hibe haani furtude kurkanaade ɓe, ko fii ɓen wonbe nafitorde golle mabbe den, ko yibbe mabbe gomdinbe. Kodun haanudaa jannude waajoo.

Fii Jandeeji Bondi din e Giggol Kaalisi

³ Si goddo no jannirde noone goo, hara o alaa jokkude kongudi selludi Iisaa Almasiihu Joomi men on, e janndeeji yaadudi e laawol Alla ngol, ⁴ haray on ko townitiido, mo andaa huunde, wondudo e nawnaare yeddondiral e poodotiro haala. Kodun wonata neene nawliigu e poodotiro e hoyre e sikkitaareeji bondi, ⁵ e yeddondire de lannataa hakkunde yimbe ɓe hakkille bonde, ɓe andaa goonga, jogorbe dewal ngal wa ɓundu kebal.

⁶ Ko goonga, dewal ngal ko tono moolanaado, si tawii en yondinorii ko jogiden kon. ⁷ Ko fii en addoraano hay huunde e oo aduna, awa kadi en nattortaa hay huunde. ⁸ Si tawii non hidèn mari neema e conci, yo dün yonu en. ⁹ Kono ben faalaabe aldude yanay e nder jarrabuyee, e nder pircol, e faaleeji duududi njofooji, bonnaydi, ko yollata yimbe ben e nder yeebaare e halkaare. ¹⁰ Ko fii giggol kaalisi ko dadol kala bone. E nder ko wobbe ben himmani dun kon, ɓe wodditii gomdinal ngal, ɓe waditii kambe tigi tampereeji.

Fii Yamirooje de Timotee Yamiraad den

¹¹ An non, oo aaden Alla, dogu din pijji, daabitaa peewal ngal e wuuirigol no Alla faaliraa non e gomdinal ngal e giggol ngol e wakkilaare nden e newaare nden.

¹² Tippiraa tippiro moyyo fii gomdinal ngal, catodaa e *ngurndan poomayankejan dan, dan noddiradaa fii mun dan, dan qirritordaa qirritannde moyyere fii mun yeeso seedeobe duudube. ¹³ Mi yamirii ma e yeeso Alla, on Yedoowo ngurndan kala huunde, e yeeso Iisaa Almasiihu on, on seeditorso qirritannde mun moyyere nden yeeso Pilaatu Pontii lando on, ¹⁴ dofto yamiroore nden e hoore laabal e no felnoraa, haa nde Iisaa Almasiihu Joomi men on feepi. ¹⁵ Feenugol makko laatoo e saa'i mo Alla happy on, dun ko on Yeesoojo bajjo moyyo, Lando lambe, Koohoojo koohoobe ben, ¹⁶ on mo tawata ko kajun tun woni maayataa, Hodudo e jalbeendi

ndi badotaako, mo godđo woo yi'aali, waawataa yi'ude kadi, on mo teddungal e bawgal wonani haa poomaa. Aamiina!

¹⁷ Yamir aldube ɓen e oo aduna fewndiido, wota ɓe wonu mawnintiniibe, wota ɓe faw tama'u mabbe on e ngaluuji di luttataa din, kono yo ɓe wadu tama'u mabbe e Alla, on Yedoowo en fow haa feyýita fii no weltoroyoden.¹⁸ Yo ɓe wadu ko moyýi, ɓe aldira kuude moyýe, ɓe wona okkoobe e kafidotoobe. ¹⁹ Wadugol mabbe dun, ko wa sincugol didol moyýol fii ko aroyta kon, e fii no ɓe tamira ngurndan haqiiqajan dan.

²⁰ Ko an yo Timotee, jogito koo ko halfinadaa, e nder reenagol e haalaaji mehi, di yaadaa e faale Alla on, e yeddondire fii gandal fenaandewal, ²¹ e nder ko wobbe ɓen humii e ngal gandal kon, ɓe seli gomdinal ngal.

Yo moyýere Joomiraado on wonu e mon!

PREMIÈRE ÉPÎTRE À TIMOTHÉE

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée